

沅陵縣志

沅陵縣志

沅陵縣志卷四十一

藝文一

五代晉

復溪州銅柱銘

有序

學士

李宏皋

粵以天福五年歲在庚子夏五月楚王召天策府學士李
宏皋謂曰我烈祖昭靈王漢建武十八年平徵側於龍編
樹銅柱於象浦其銘曰金人汗出鐵馬蹄堅子孫相連九
九百年是知吾祖宗之慶胤緒綿遠則九九百年之運昌
於南夏者乎今五溪初甯羣師內附古者天子銘德諸侯
計功大夫稱伐必有刊勒垂諸簡編將立標題式昭恩信

敢繼前烈爲吾紀焉宏臯承教濡臺載敘厥事蓋聞牂牁
接境槃瓠遺風因六子以分居入五溪而聚族上古以之
要服中古漸爾羈縻洎帥號精夫相名妣氏漢則宋均置
吏稱靜溪山唐則楊思興師遂開辰錦邇來豪右時恣陸
梁去就在心否臧由己溪州彭士愁世傳郡印家總州兵
布惠立威識恩知勸故能歷三四代長千萬夫非德教之
所加豈簡書而可畏亦無辜於大國亦不虐於小民多自
生知因而善處無何忽承間隙俄至動搖我王每示含宏
嘗加姑息漸爲邊患深入郊圻剽掠耕桑侵暴辰澧疆吏
告逼郡人失甯非萌作孽之心偶昧戢兵之法焉知縱火

果至自焚時晉天子肇造丕基倚注雄德以文皇帝之徽
號繼武穆王之令謨冊命我王開天策府天人降止備物
在庭方振聲明又當昭泰眷言僻陋可俟綏懷而邊鄙上
言各請効命王乃以靜江軍指揮使劉勅率諸部將付以
偏師鉦鼓之聲震動谿谷彼乃棄州保嶮結寨憑高惟有
鳥飛謂無人到而劉勅虔遵廟算密運神機跨壑披崖臨
危下瞰梯衝旣合水泉無汲引之門樵採莫通糧糗乏轉
輸之路固甘衿甲豈暇投戈彭師杲爲父輸誠束身納款
我王愍其通變爰降招攜崇侯感德以歸周孟獲畏威而
事蜀王曰古者叛而伐之服而柔之不奪其財不貪其土

前王典故後代著龜吾伐叛懷柔敢無師古奪財貪地實
所不爲乃依前奏授彭士愁溪州刺史就加檢校太保諸
子將吏咸復職員錫命有差俾安其土仍頒廩粟大賑貧
民乃遷州城於平岸溪之將佐銜恩向化請立柱以誓焉
於戲王者之師貴謀賤戰兵不染鏑士無告勞肅清五溪
震讐百越底平疆理保乂邦家爾宜無擾耕桑無焚廬舍
無害樵牧無阻川塗勿矜激瀨飛湍勿恃懸崖絕壁荷君
親之厚施我不徵求感天地之至仁爾懷甯撫苟違誠誓
是昧神祇垂於子孫庶爾族類鐵碑可立敢忘賢哲之蹤
銅柱堪銘願奉祖宗之德宏臯仰遵王命謹作頌焉其詞

曰 昭靈鑄柱垂英烈手執干戈征百越我王鑄柱底黔
黎指畫風雷開五溪五溪之嶮不足恃我旅爭登若平地
五溪之衆不足憑我師輕躡如春冰溪人畏威仍感惠納
質歸明求立誓誓山川兮告鬼神保子孫兮千萬春

宋

槃瓠辨

羅泌

有自辰沅來者云盧溪縣之西百八十里有武山焉其崇
千仞遙望山半石洞鑿啟一石貌狗人立乎其旁是所謂
槃瓠者今縣之西南三十里有槃瓠祠棟宇宏壯信知天
下有奇迹也予曰是黃岡武陵記所志者然實誕也曰然

則所謂槃瓠者非歟曰非也何以言之予稽夏后氏之書
知之也伯益經云卞明生白犬是爲蠻人之祖卞明黃帝
氏之曾孫也白犬者乃其子之名蓋若後世之烏髡犬子
豹奴虎狔云者非狗犬也雖然世之誕妄厥有形影其言
之不典亦實有於經也按經又言卞明生白犬白犬有二
自相牝牡郭氏以爲自相配合蓋若今之婆羅門半釋迦
者而應劭書遂以爲高辛氏之犬名曰槃瓠妻帝之女乃
生六男六女自相夫婦是爲南蠻則知其說原衍於此殆
以白犬爲龙爾至郭璞張華于寶范蔚宗李延壽梁載言
樂史等各自著書枝葉其說人以喜聽而事遂實矣且其

說曰募有得犬戎吳將軍首者黃金千鎰邑萬家妻以少女杜君卿固疑其誕謂黃金古以斤計至秦始曰鎰一也三代分土漢始分人古安得萬家之封二也將軍周末之官三也吳姓至周始有四也佑之難亦當矣又引其獄中與諸生書證之然不知其說之出乎蔚宗也高辛之事常竊誕之槃瓠者特獬廌之轉音余按元中記槃瓠浮之東南海中是爲犬封氏蓋因本風俗通然亦不謂蠻人之祖曰然則廬溪之祠及武山之像何彰邪曰見石西俯則以爲爲惠遠點頭見石東僂則以爲爲秦皇赴海木石之像物厥類多矣偶然喚作木居士豈特一槃瓠而已邪不然

犬我國之神哉經亦有云犬我國有犬戎神人面而獸身
非蠻之祖也

元

辰州火星祠碑記

學政 武丙發

星之有祠其來久矣按天文志天有五星應五行而熒惑
屬南方夏火禮也視也凡聖明御宇必鑑視其所在是以
唐虞氏之火正閼伯居商丘祀大火而以火紀時焉蓋古
之火正卽火官也掌祭火星行火政漢立祠於長安其後
州郡皆有之辰州爲郡僻在萬山厖居櫛比鬱攸之變朝
夕隱憂延祐改元亞中大夫大同毛公伯帖木兒總管是

邦美化大行百廢具舉思求以膏澤吾民首修火政具緹
缶蓄塗源儲卒徒儻可備大火者靡不究心然天火之災
何以彌之詢諸邦人咸以火祠未立爲闕典顧瞻州治之
左元妙觀之右隙地數畝厥土燥剛厥位面陽乃捐俸鳩
材人懽趨之同寅協力梓匠服勞不逾數月棟宇翬飛又
考諸祭法幽宗祭星也雩宗祭水旱也山川能出雲爲風
雨皆曰神能禦大菑捍大患則皆祀之凡五嶽名山悉載
祀典其神如水在地中無往而不在也侯重念及此復創
嶽廟於其前像而肖之尸而祝之使民邀福有地繼今以
往連甍接棟無黔廬赭垣之患耕田鑿井無水旱疾疫之

虞侯之嘉惠豈淺哉矧一善言而星退舍一叩頭而天
返風感應之機捷如影響邦人頌德不已且俾予敘其概
予聞安靜之吏惻惻無華無華者誠也侯以誠實待民以
誠意格神神受其靈民受其賜巍巍不朽之功殆與辰山
相爲無窮矣若夫戶牖綢繆一日必葺端有望於後之來
者延祐三年夏月中瀚學士左郎湖廣省提督學政武丙
發記將仕郎辰州路總管府知事謝世賢承務郎辰州路
總管府判官馬合馬沙明威將軍同知辰州路總管府事
禿魯迷失嘉議大夫辰州路總管府達魯花赤兼管內勸
農事小云失帖木兒安遠大將軍鎮守辰州路昆陽萬戶

府萬戶移刺四奴等立石總管毛亞中男希先書學正呂
宣之篆

沅陵縣志卷四十二

藝文二

明

辰州府新息侯廟記

御史監湖廣銀場

薛

瑄

德溫河津

古有功蓋於一時名垂於後世饗生民之祀於無窮者豈非大丈夫抱非常之才識本之以忠誠行之以悠久而有以通神明貫金石達古今而無間乎漢伏波將軍馬公援天與魁奇器識宏遠當漢統中微新莽竊命之日乃遠迹邊陲混身田牧時人弗之識也獨其兄況謂曰汝大才當晚成良工不示人以樸且從所好公亦嘗曰大丈夫爲志

窮當益堅老當益壯公之所立固已見於此矣及其盡散
財蓄志清時難遨遊隴蜀擇所適從知嘯起草竊之徒皆
酣豢富貴於一時不足計安生民於萬世也遂謁光武於
洛陽一見之頃卽以恢廓大度同符高祖稱之因委質臣
事効忠戮力以匡復漢室若聚米之開示山川銅柱之威
服殊俗皆公之奇謀偉績其他蕩除戡靖維調贊翼之策
尤多中興之功公無與讓及天下底定割符受封爵列五
等榮寵並極而公不以是自侈嘗奮不顧身志欲効死邊
疆以盡臣節至武陵郡蠻擾邊公遂請行兵至臨沅蠻卽
摧破師次壺頭大功未就而公卒先是有以兵事聞於帝

者時遣來監軍之人素有恨於公而公已歿遂厚加譏誣以快其私而惹致之謗亦興焉嗚呼若公之所立卓偉奇特駕一世而橫驚挺百代而獨出猶不免巧夫之唇舌他尙何言議者又以不從充而從壺頭爲公失計夫曠日老師而費糧與捷徑出奇以致勝利害甚明而公之慮審矣設使如或者之言從充而進又安能必保蠻寇之無齟齬乎是又不得爲公失計也夫宋均矯一節以入羣蠶猶足以致其震懾來服若公稍緩死當有他策以制蠻矣又豈云云者所能測哉夫其韜晦自養散財濟難公之大志也鄙斥奸豪獨歸真主公之大識也奇謀勇畧光輔中興公